

'N A CARTUINA BIANCA

(Winterreise durch Bayern)

*Sentomia fiochi
semenài sora i fossi...
i me pare pochi!
Sento milioni de fiochi
sparpagnài sora e case e sora i prai;
milion de milioni de fiochi de neve
che piove dal ceo...
i me pare 'ncora pochi!
Milion de miliardi de faive
che te vien dosso
man man che te ve vanti.
Miliardi e miliardi de bianchissimi pixel,
de candide farfae
congeàe
ma vive...
no i zé gnancora tanti!
'Na esplosion de farina,
na bomba tómica de zúcaro a veo,
'na sprussada
de piume che i angei ga perso...,
e mi...
soto 'na bufera
in meso sta cartuina bianca,
co e man sol voeante,
atento a 'l sterso,
coi pié sui pedai,
coi oci che varda vanti
fora de a testa fissi so a strada,
col core che s-ciopa, che prega, che prega,
de gioia e paura...
pensando a 'a fameja restá ormai distante...
e mi!,
in meso sta cartuina bianca
sercando de 'ndarghe drio
a 'na stradina scura
che no finisse mai
che va sú, che va zo
drio 'l stampo dee cuine
che va zo che va sú a destra e a manca,
drio 'l stampo de a Baviera,
speneá, par fortuna, dal deo de Dio!*

Zaniolo Roberto Giovanni

2. Classificato Premio Internazionale "Mario Donadoni"

Bovolone - Verona

18 Ottobre 2008